

Dada en Roa, veynte dias de nouienbre, año del nasçimiento del nuestro Señor Jhesuchristo de mill e quatroçientos e veynte e çinco años. Yo el rey. Yo Miguel Gonçales, la fiz escreuir por mandado de nuestro señor el rey. Registrada, vista e acordada en consejo, un relator.

## 103

1425-XII-7. Roa.—*Juan II ordena a Juan Alfonso Román hacer residencia en Murcia.* (A.M.M., Caja 1, núm. 11 y Cart. 1411-29, fol. 167v.)

Publ. BERMÚDEZ AZNAR, J.: *El corregidor en Castilla...*, 257-258.

Don Johan por la graçia de Dios rey de Castilla, de Leon, [de Toledo], de Gallizia, de Seuilla, de Cordoua, de Murçia, de Jahen, del Algarbe, de Algezira, e señor de Vizcaya, e de Molina. A vos el bachiller Juan Alfonso Roman, mi juez e corregidor de la çibdat de Murçia, salud e graçia.

Sepades que por parte del conçejo, e regidores, e ofiçiales, e omes buenos de la dicha çibdat de Murçia me fue fecha relaçion en como vos yo enbie por mi juez e corregidor a la dicha çibdat de Murçia, e que por mis cartas vos enbie mandar que touiesedes los ofiçios de la justiçia çeuil e creminal della e de su tierra por çierto tienpo e con çierto salario, segund que mas largamente en las dichas mis cartas se contiene, e agora diz que vos antes de ser conplido el tienpo que vos yo mande que touiesedes los [dichos] ofiçios en la dicha çibdat, e eso mesmo diz que sin fazer la regidençia de los çinquenta dias que segund ley de ordenamiento real deuiérades fazer en la dicha [çibdat] despues de conplido el tienpo del dicho vuestro corregimiento que vos absentastes e fuéste de la dicha çibdat e su tierra por tal que las presonas que de vos auian e [an] algunas que-rellas no alcançasen conplimiento de derecho e justiçia de vos de los agrauios e sin razones que diz que les auia des fecho e fiziéste durante el dicho vuestro [ofiçio], e diz que segund derecho sodes tenuto e obligado de fazer en la dicha çibdat de la dicha regidençia de los dichos çinquenta dias porque los querellosos [alc]añen de vos conplimiento de justiçia, e diz que si de otra guisa ouiese a pasar que la dicha çibdat e vezinos e moradores della re[çibiri]an grand agrauio e dap[ñ]o, e pedieronme por merçed que proueyese sobrello como mi merçed fuese, e yo touelo por bien.

Porque vos mando, vista esta mi carta, que fagades en la dicha çibdat de Murçia la regidençia, segund e por la forma e manera que la ley del ordenamiento real manda porque los vezinos e moradores de la dicha çibdat e su tierra ayan e alcançen de vos conplimiento de justiçia de los agrauios e sin razones e [di]z que les fiziéste durante el tienpo del dicho vuestro ofiçio como dicho es, e no fagades ende al por alguna manera so pena de la mi merçed e de diez mill maraue-



dis para la mi camara, e demas si lo asi fazer e complir no quiesieredes mando al ome que vos esta mi carta mostrare que vos enplaze que parescades ante mi en la mi corte doquier que yo sea del dia que vos enplazare fasta quinze dias primeros seguitos so la dicha pena, e mando so la dicha pena a qualquier escriuano publico que para [est]o fuere llamado, que de ende al que vos la mostrare testimonio signado con su signo porque yo sepa en como se cunple mi mandado.

Dada en la villa de Roa, siete dias de dezienbre, año del nascimiento del nuestro Señor Jhesuchristo de mill e quatroçientos e veynte e çinco años. Yo el rey. Yo García Lopes de Leon la fiz escriuir por mandado de nuestro señor el rey. e corregidor de la çibdat de Murçia, salud e graçia.

## 104

1425-XII-10. Roa.—*Juan II exime al concejo de Murcia del pago de monedas por cinco años a causa de la riada sufrida años antes.* (A.M.M., Cart. 1411-29, fol. 165v.)

Publ. ABELLÁN PÉREZ, J.: *Las plagas de langosta...*, 89-91.

Don Juan por la graçia de Dios rey de Castilla, de Leon, de Toledo, de Galizia, de Seuilla, de Cordoua, de Murçia, de Jahen, del Algarue, de Algezira, e señor de Vizcaya, e de Molina. A vos los mis contadores mayores, salud e graçia.

Sepades que enel ayuntamiento que yo fize en la villa de Palençuela este año de la data desta mi carta me fueron dadas çiertas petiçiones por los procuradores de las çibdades de los mis regnos entre las quales me fue dada una petiçion, su tenor de la qual e de lo que yo a ella respondi es este que se sigue:

A lo que me pidieron por merçet que por quanto a vuestra notiçia era venido como de dos años a esta parte por cabsa de las grandes agelas que en la çibdat de Murçia e su tierra fueron quel rio de Segura que pasa por la dicha çibdat creçiera tanto e en tal manera que el grant poderio de la dicha agua ronpiera gran parte de los muros della e entrara dentro enella, e que derribara fasta seysçientas çasas, e se auia perdido todo el trigo, e çeuada, e vino, e azeite, e bienes muebles que conellas auian, e que por esta razon la dicha çibdat estaua muy mal poblada e no era tambien guardada como cunplia a mi seruicio, e que por cabsa dello muchos de los vezinos de la dicha çibdat se auian ydo Aragon que era a quatro leguas de la dicha çibdat e como la dicha çibdat era cabeça de aquella comarca e muy çercana de los moros que podria acaesçer que por no estar a tambien poblada e çercada recreçeria a mi seruicio e a los mis regnos grant daño, por ende que me suplicauades que me plugiese mandar proueer sobrello en la manera que mas cunpliese a mi seruicio porque la dicha çibdat se tornase a poblar e la mi tierra fuese mejor guardada a lo qual vos respondo que mi merçet es e mando que la dicha

